



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : Tir Yimyim tiryimyim@aolima tir yimyim TAPAK 8

Küm matemdangsa tain ajak nem vaccine agütsütettsü: Harsh Vardhan

Suu Kyi yakta temai adoktsü: Myanmar junta



VOL. XVIII NO. 218 (ADOK 218) DIMAPUR

AMUNGNÜ (SUNDAY)

MONUPII (MAY) 23, 2021

₹ 5.00

## Tanurtemia Covid menar saka shirangba balaka majiteter

New Delhi, May 22, 2021

(Agencies): Tanurtemi COVID-19 menar saka parnok dak shirangba yimya kangabo madoker, ta NITI Aayog member - health Dr VK Paul-i ashi.

COVID-19 wara menatepba nung tanurtem medendaktsütsü atema Centre sorkari mapa inyaker, ta paisa ashi.

COVID-19 wara tanabuba nung tanurtem dak-a putetogo aser iba ajanga linük nung health mongintemi temang nung tashidak aliba tanurtem dak COVID putetba anepalutsü atema lenmangtem bushir.

"Tanurtem asoshi khuret tulu abentsüla. Parnokia COVID menar, saka shirangba yimya kangabo madoker. Parnok dak shirangba kecha majiteter" ta Honibarnü Dr Paul-i ashi.

India linük nütsüng yongsük nung arishi küm 14 ser teküpok 26% lir aser 7% shi ka arishi küm

5 teküpok lir.

Taoba mapang National Commission for Protection of Child Rights-ia Union Health Ministry aser Indian Council of Medical Research dang COVID-19 wara tasembuba nung tanurtem dak kanga mejungi kongshitsü ta kümdangtsü atema shidi ka zülüogo.

"India nung Covid wara tanabuba nung jilatem dang nungibo yimtsüngtem nung tuluba kongshiogo. Ajisüaka linük nung Covid tensa tajungba kümdar" ta Dr Paul-isa ashi.

"Linük kübok shilem tulubalen wara kokteta aruogo. Nisung o nisung menatepba ajemogo aser shirangertem tajemba akümer" ta paisa shisem.

Nisung kati vaccine ka agiba sülen ano tanga company indang vaccine ka agitettsü asü koda ta osangbeneri asüngdangdang "ibaji tamakoktsü" ta Dr Paul-i langzü.

## COVID-19 Nagaland: Nisung 252 dak putet; 214 taneptsü angu Governor-i Black Fungus (Mucormycosis) indang metetdaksür

Dimapur, May 22, 2021 (TYO):

Honibarnü Nagaland nung nisung 252 dak Covid19 aliba putet aser parnok züngsema nisung ajak agi 19,845 kümogo.

"Tanü nisung 252 dak COVID putet. Parnokji Dimapur nung 137, Kohima nung 50, Mokochung nung 17, Zunheboto nung 15, Phek nung 11, Tuensang nung 8, Wokha nung 6, Mon o Kiphire nung asemsem (3) aser Peren o Longleng nung kaka (1) lir" ta Health & Family Welfare Minister, S Pangnyu Phom-i metetdaksü.

"Maneni, tanü Covid19 puteta alir nisung 214 taneptsü nguogo. Parnokji Dimapur nung 135, Tuensang nung 27, Kohima nung 19, Mon nung 14, Phek nung 7, Wokha nung 5, Longleng nung 3, Zunheboto nung 2 aser Kiphire o Peren nung kaka lir" ta paisa ashi.

Nisung 19,845 rongnungi 14,363 taneptsü nguogo aser tang nisung 4,607 anepaludar.

"Honibarnü COVID-19 puteta lir nisung 13 tashi asü. Dimapur nung nisung 10, Kohima nung 2 aser Zunheboto nung 1 asü. Parnok züngsema tasür ajak agi 271 kümogo saka parnok 11 bo tanga tashidak ajanga asü," ta Integrated Disease Surveillance Project atema state nodal office officer, Dr Nyanthung Kikon-i metetdaksü.

Nagaland nung COVID-19 puteter nisung 604 tashi tanga state temi ogo, ta paisa shisem.

Tang tashi nung COVID-19 alitsü akok ta temolung melemi bilemba sample 1,82,509 tendangogo. RT-PCR ajanga 86,484, TrueNat ajanga 53,429 aser Rapid Antigen Test ajanga 42,596 tendang, ta Dr Nyanthung Kikon-isa ashi.

"Hokolbar tashi nung Nagaland nung nisung 1,99,215 nem COVID-19 vaccine indang dose 2,53,153 agütsüogo," ta State

Immunization Officer Dr Ritu Thurr-ia metetdaksü.

Vaccine agirtem rongnung frontline workers 56,830, healthcare workers 15,319, arishi küm 45 ser temapur 1,19,768 aser arishi küm 18 nungi 44 tsüngda alir 7,298 dena lir, ta paisa ashi.

"Vaccine agirtem rongnung nisung 53,938-i dose anaprong agiogo aser parnokji frontline workers 27,872, healthcare workers 10,172 aser arishi küm 45 ser temapur 15,894 lir" ta Dr Thurr-isa shisem.

Centre sorkari tetuyuba agütsüba ama Nagaland Governor-i Honibarnü Black Fungus (Mucormycosis) ya wara ka ta sangdongogo.

Governor-i Nagaland Epidemic Diseases (Mucormycosis) Regulations 2021 sangdongogo, ta Principal Secretary, Amardeep S Bhatia, IAS-i metetdaksü.

## WHO-i Nagaland nem oxygen concentrators agütsü



OXYGEN CONCENTRATOR

Dimapur, May 22, 2021

(TYO): Honibarnü World Health Organisation (WHO)-i Nagaland nem oxygen concentrators 150 agütsüogo.

"Iba ama tensa ka nung teyari tulu agütsüba atema pelar" ta minister Pangnyu-i Twitter nung metetdaksü.

WHO-i agütsüba oxygen concentrators ji district ajak aser health care centres nem

agütsütsü, ta paisa ashi.

Hokolbarnü IAF tayimtsü ajanga Nagaland indang oxygen cylinders (400 jumbo and 800 B-type) bener aruogo.

Tayimtsü ajanga oxygen cylinders bentsür aruba atema Nagaland chief minister Neiphiu Rio-i Union defence minister Rajnath Singh aser IAF dang pelaba metetdaksüogo.

## Covid shirangertem dak Black Fungus atongba temetettsü

New Delhi, May 22, 2021

(Agencies): COVID-19 agi shirangertem tekolak kanga ngora mesüra tejak külen wakra Black Fungus tendangang, ta All India Institute of Medical Sciences (AIIMS) Delhi nung Director, Dr Randeep Guleria-i metetdaksüogo.

"Ano, tebang telonglen sentsü melenshira aser tejak nung shilem kar nung temeyong agi kongshidang junga memetetra Black Fungus tendangang" ta paisa ashi.

"Teni tangbangba, teni

awakba aser tepo alokshibaji Black Fungus tenzükerba lir saka shisa mebului doctor teyari bushitsüla" ta Dr Guleria-isa shisem.

Black Fungus mesüra Mucormycosis ya sinuses indang X-ray mesüra CT scan ajanga puteter. Ano, nasal endoscopy ajanga biopsy agia puteter.

"Black Fungus ya menatepba tashidak ka masü yonga India nung nisung aika dak puteter. Iba ya diabetes keta alir aika aliba aser ano talenbangba kecha melii steroids ayokba ajanga lir. Yaküm

Covid wara nunga mucormycosis adok saka steroids kanga amshiba ajanga taküm nisung timba dak puteter," ta AIIMS Director-isa metetdaksü.

Nisung ajak aser Covid malir dak-a mucormycosis adoktsü akok. Ajisüaka, diabetes aketer arishi küm 40 temapur dak tezübaba adoker. Tanurtem dak iba tashidak balaka madoker kechiyong parnok dak Covid agi tera dang kongshir aser parnok nem steroids magütsür, ta paisa ashi.

## Arunachal nung ARjawan ka khaset; 2 yiru

Itanagar, May 22, 2021

(Agencies): Arunachal Pradesh kübok Changlang district nung Honibarnü National Socialist Council of Nagaland (Khaplang-Yung Aung) telungpurtem asütsü akok ta temolung melemi bilemertemi Assam Rifles jawan ka khaset aser ana yirutsü.

Iba lendong nung tasüsangji Rifleman Avatar Chakma ta jangjaogo, ta Changlang deputy commissioner Devansh Yadav-i metetdaksü.

"Changlang district kübok Longvi yimtsüng nung sepaitem aser telungpurtem tsüngda khatepdang Assam Rifles jawan ka khaset aser ana yiru" ta pai ashi.

Bablu aser Rifleman Baldev na ta jangjaogo aser tena tayimtsü ajanga army hospital kati anir ogo, ta DC Devansh Yadav-isa metetdaksü.

Iba tesem nung security forces-i telungpurtem anema mapa tulu ka tenzükogo, ta Changlang DC-isa shisem.

"Honibarnep 9:00 ako meta Assam Rifles column kati maparen ka inyakdang telungpurtemi parnok dak injang khaloktsü aser idangji jawan khaset" ta police-i ashi.

Arunachal Pradesh kübok Longvi yimtsüng nungi kilometer 8-9 shi ka pilar iba ya atalok.

Arunachal Pradesh kübok Changlang district yagi Myanmar den arrtsüa lir.

## Arunachal MLA-i PM Modi dang PUBG metenzükdaksütsü mepishir



Itanagar, May 22, 2021

(Agencies): Pasighat West Assembly Constituency nungi Congress MLA Ninong Ering-i Prime Minister Narendra Modi dang India nung PUBG Mobile as Battlegrounds Mobile tanaben mesayatsü atema mepishio.

Yaküm India sorkari foreign apps aser websites 260 tashi noktanga liasü.

PUBG densema apps 260 ya India linük indang security aser

public order atema lendong lir ta shia Ministry of Electronics and Information Technology, Government of India (MeitY)-i Information Technology Act nung arrla 69A kübok noktanga liasü.

"Asen linük nung Covid wara anema inyakba mapang ka nung aser Centre o state sorkartemi iba atema bendanga agüja inyakdang, Krafton, Tencent aser PUBG India Pvt. Ltd. densema PUBG

den sendaktepa aliba company temi sorkar aser India sensotem ashioktsür Battlegrounds Mobile India (BMI) tenüng tasen agütsür iba game tenzüksütsü osang angazüker" ta Ninong Ering-i PM Modi dangi shidi ka zülü.

"Iba ya temelenshi tila kar asüba dang ashi kasa game lir aser iba ajanga asen senso million aika indang user data bendentsü. Iba nung asen chirnnurtem dena lir aser data ji foreign company tem aser China sorkar dangi aotsü" ta paisa ashi.

"Supreme Court of India-ia indangindanga meinyakba mashileni inyaktettsü ta shiogo. Taoba mapang PUBG ajanga takoksa jenti bentsür aruogo aser linük ozüng alema parnoki inyaksangshiogo. Anungji, PUBG tanaben metenzüktsü atema ozüng ka yanglutsüla" ta Ninong Ering-isa PM Modi dang ashi.



May 22, 2021 nü WHO-i, Health & Family Welfare nem oxygen concentrator 150 tenla agütsüogo. CMO, WHO Dr. Shila Longkumer-i, WHO tenüng nung Principal Director Dr. Niekhrilie Khimiao nem oxygen concentrator tem amokja liasü. Kasa mapang nung Principal Director-i, department nem mulungso tenla tajung agütsüba atema kanga pelaba lemsatep, aser talisa wara pokteter Oxygen concentrator kanga nungdaka aliba mapang iba tenla tajung agütsüba atema alia pelaba lemsatep. Maneni department tenüng nung pai WHO dang kanga pelaba aser WHO takok asoshi imlaja ataba lemsatep.

### NVCO-i AKMWP tir Neibule mang ayimer

**Dimapur, Monupii/May 22 (TYP):** Association of Kohima Municipal Wards Panchayat (AKMWP) tir Neibule Kiewhuo, May 21 nü ajungbena asüba osang angazüka mang ayimba NVCO-i sangdong ka ajanga lemsatep.

Neibule asüba ya Kohima jila nung aliba nüburtem atema takoksa tulu lir shiba, iba jila environment/infrastructural development/ beautification atema bendanga agüja inyakogo, koba Centre sorkari temelaba agütsür aliba smart city atema tenüngdakatem lir. Paisa, food safety aser shishilembartem makoksatsü atema jenjang yanglushiba, Kohima Municipal Council (KMC) kübok kiyong balala

lenirtem longjemer nüburtem atema inyaktüsü aser state yimtiba ya talitsü asoshi tesem tajung ka kümdaktsütsü atema kanga meranga inyakogo, ta ashi.

NVCO President tir Savi-i, March 15 nü "World Consumer Rights Day" ayongzüka amungba mapang AKMWP tir Neibule Kiewhuo-i shishilembaba dak sendakba nung saruba balala sayuba, tekübokba jenjang nung aliba osettem ayokba, oset belenshiberaba atema sen aika meshiba, oset nung jenjang tali ajungketba, electricity/water supply amala nung tetsükdaktsü ajurubattem indang tebilemtsü kaa jembiba bilemtetshia jembiba.

Savi-isa, AKMWP tir ya tawa Deputy Commissioner Kohima office nung agiba District Price Monitoring Committee senden nunga denogo, ta ashi koba pa asoshi onük kanga tongtibang liasü. Consumer activist ka ama onok maneni Sub-Committee ka ama inyaktüsü, ajisüaka asen taküm ya teyanglur Tsüngrem kabuma nung lir aser Tsüngrem sentong agizüktüsü. Lenir ka ama pa nukla tajung nüburtemi kodanga mamatoktsü. NVCO-i asür kibong den asükhü lemsateper aser asür tanüla tesunep nung anisüngzükdakjang ta sarasademtsür, ta NVCO Press & Media Cell sangdong ka ajanga metetdaktsü.

### Mopungchuket nung "Guru Shishya Parampara Kendra" lapok



May 22 nü Guru S. Panyang Ozüküm den pa den teyariteper aser tangazükertem, Mopungchuket yimtsüng nung NEZCC kübok Guru Shishya Parampara Kendra lapokba sentong nung tangokba noksa nung angur.

**Dimapur, Monupii/May 22 (TYO):** Mokokchung district kübok Mopungchuket yimtsüng nung tanü "Guru Shishya Parampara Kendra" ka lapoktsüogo. "Guru Shishya Parampara Kendra" ya Ministry of Culture, Government of India Guru Shishya Parampara Scheme kübok lir, koba tetsü tebou ken aser tsüngsang luyim nung North East Zone Cultural Council (NEZCC)-i benoka inyaksangshir.

Kendra lapokba sentong nung o jembiba mapang Guru S. Panyang Ozüküm-i, iba scheme atema applicant 67 rongnungi NEZCC-i paa shima liasü, ta ashi. Paisa, iba scheme kübok

NEZCC-i Kendra mesera centre ya küm ka atema inyaksangshitsü atema shimmer aser pa den teyariteper kati "shishyas" mesera kaketshir pezü nem tangazükba agütsütsü, shirnok nem stipends dena agütsütsü, ta ashi. Guru S. Panyang Ozüküm-i, tejangrartemi pa indang "Kendra" nung "shishyas" ama züngoksema angazükettetsü, ta ashiba den lanurtem dang sobaliba ken, tsüngsang, inyakyim angazüktsü ajungshi, kechiyong iba ya kaketsü bushiba aser pei tamangba den kasa dang tongtibang lir, ta ashi.

Kendra lapokba sentong nung o jembiba mapang Tazü

Lenten Cultural Society (TLCS) tir Nükshitemjen-i, Guru S. Panyang Ozüküm shibai iba club 1983 küm tentet, pa ya tetsü tebou sobaliba aser inyakyim kanga jangjaa meteta aliba nisung ka ta ashi. Paisa, Guru Shishya Parampara Kendra ya Aoer sobaliba nung Arju (morung) den kanga mesükteper, kong lanurtemi tsürapur nung sobaliba balala angazüka liasü, ta ashi.

Maneni Mopungchuket village council nung Sosang Kümsangyanger-i, Guru S. Panyang Ozüküm nem tenüngsang agütsüba den yimtsüng nung tang mezüngbuba iba amala scheme ka benoker ta ashi.

### NSCN/GPRN-i asükhü lemsatep

**Dimapur, Monupii/May 22 (TYO):** NSCN/GPRN media cell sangdong ka ajanga, Ao Region kübok Sungratsü yimtsüng nung Steering Committee züngsem Sashiba Aier, Union Territory (UT) kübok Hovishe yimtsüng nung Deputy Kilonser Atoshe Aye aser Sumi Region kübok Litsami yimtsüng nung Deputy Kilonser Atoho Yeptho nung May 22 nü asüba osang

angazüka khu kua mang ayimba lemsatepogo.

National Mourning Days ama May 22, 2021 nungi 24, 2021 nü anü malu tashi GPRN office ajak shibanga atatsü, aser asürtem nem aküm tetushi agütsüba temaitsü mang ayimba mapang Naga national wako tesadang ka dang atsüketa ayutsü, ta MIP, NSCN/GPRN sangdong ajangsa metetdaktsü.

### Mon district ajunga May 31 tashi mokdanga ayutsü: DC

**Dimapur, Monupii/May 22 (TYO):** DC Mon, Thavaseelan K, IAS-i sandong ka ajanga, May 13, 2021 nü tetuyuba agütsür aliba dak ajemdaker Mon district ajunga May 31, 2021 tashi mokdanga ayutsü metetdaktsüogo.

Iba tetuyuba sülen manidakertem ajak Disaster Management Act 2005 section tape-tem aser IPC Section 188 aser tanga temzüng ozüng tapet dak ajemdaker merenshitsü, ta DC-isa metetdaktsü.

### Chozuba ADC-i metetdaktsür

**Dimapur, Monupii/May 22 (TYO):** Government of Nagaland, Home Department (NSDMA) aser DC Phek tetuyuba dak ajemdaker ADC Chozuba-i sangdong ka ajanga, Chozuba Sub-division nung covid-19 tashidak menatepa aoba nokdangtsü atema May 31 nü tashi Sub-division mokdanga ayutsü

aser tang tetuyuba agütsür alibattem ajak benoka inyaksangshia atatsü, ta metetdaktsüogo.

Kari danga iba tetuyuba sülen manidakra Disaster Management Act, 2005 section 51 nungi 60 aser IPC Section 188 dak ajemdaker tapet temerenshi agütsütsü, ta ADC-isa metetdaktsü.



HQ IGAR (North) kübok Assam Rifles Mokokchung Battalion-i, May 20 nü Longleng jila nung sensaker kibongtem nem ration aser tenüngdakba oset balala lema agütsüogo. Iba den bendenloksema parnoki Corona Virus aser Black fungus tashidak nungi jenboa alitsü atema jenjang balala agütsübatem indang metetdaktsü. Assam Rifles-i teyari tulu agütsüba atema jila nung aliba nüburtemi parnok nem tenüngsang agütsüogo.

### Lazami nung St. Bartholomew Convent shibangtsür

**Dimapur, Monupii/May 22 (TYO):** COVID-19 tashidak keta alir potetba aser iba den nüburtem tashidak nungi jenboa toktzüksü nükjidong nung ADC Pughoboto, Thungchanbemo Tungoe-i, Pughoboto Sub-Division kübok Lazami yimtsüng, Khuluqa Khel nung amenoka aliba St. Bartholomew Convent shibangtsüba metetdaktsüogo.

(TYO): May 21 nü sangdong ka ajanga DC Mon, Thavaseelan K, IAS-i, arishi küm 18 nungi 44 tsüngda alirtem shirnoksa Covid-19 vaccine agütsü atema mekaogo, saka parnok nem lemezükja aliba anogo nung vaccine magitetsüsa akümer, parnok dang anogo ka jelia vaccine magitetsüsa akümba osang metetdaktsütsü tetuyuba agütsüogo. Anogo ka jelia osang agütsüba ajanga vaccine aginertem nem maangka agütsütetsü. Vaccine agiba anogo Cancellation/Booking mesütetsü, ta DC-isa metetdaktsü.

St. Bartholomew Convent shibangtsür aliba mapang iba tesem temeket nung nüburtem senzusenpongtsü atema khenyongi memelatsü.


Tashidak menatepa aoba nokdangtsü atema tetuyuba agütsür aliba sülen manidakertem ajak Disaster Management Act 2005 section 51 nungi 60 aser IPC section 188 dak ajemdaker merenshitsü, ta ADC-i metetdaktsü.

Mon DC-i vaccine agütsüba osang metetdaktsü

Tanga sangdong ka ajanga DC-i, mezüngbuba vaccine dose agiba aser tanabuba dose agütsüba na tsüngda hopta 12 nungi 16 ayutsü temeleshi bener aruba metetdaktsüogo. Mezüngbuba dose agir alirtem ajak atakzükja aliba mapang nung Covishield vaccine tanabuba dose agütsü metetdaktsüogo.

Dimapur, Monupii/May 22

## ULFA-i chioksang Ritul Saikia Sonari tongogo



May 22, 2021 anepdang Ritul Saikia-i Mon district kübok Longvi yimtsüng tonga arudang agiba noksa angur.

**Guwahati, May 22, 2021**

(Agencies): ULFA-I-i chiokba ONGC nung mapa inyaker Ritul Saikia Honibarnü Sivasagar district kübok Sonari tongogo.

Tanep 7:10 ako meta pa Indo-Myanmar arrtsü adener Nagaland kübok Mon district nung Longvi yimtsüng atong.

ONGC nung mapa inyaker timtem kecha meli chiokba atema Assam director general of police (DGP), Bhaskar Jyoti Mahanta-i chief minister Himanta Biswa Sarma dang pelaba metetdaksüogo.

Ritul Saikia chiokba maparen nung Assam Police shilem kecha mali saka Assam chief minister-i dang inyaker, ta Mahanta-isa ashi.

Ajisiaka, taoba nung ONGC nung mapa inyaker ana kümzüka nungbo Assam Police-i tongti shilem agiogo, ta paisa shisem.


Ritul Saikia agizüksü atema Assam Police ana Mon district-i yok aser Ritul kinungsü den jabaso aser tedi nung Sonari tashi ao, ta DGP Mahanta-isa ashi.

April 21, 2021 nü Ritul Saikia ya Sivasagar district kübok Lakwa nungi ONGC nung mapa inyaker ana den külemi pur ao.

Indian Army aser Nagaland Police-i April 24 nü Nagaland kübok Mon district nung ONGC telungpurtem den khatpeba sülen ONGC nung mapa inyaker ana kümzüka liasü. Ajisiaka, Saikia bo menguteti aru.

ULFA(I) commander-in-chief Paresch Baruah-ia Ritul junga aliba osang metetdaksü.

## Tripura nung tetsür ka dak 'black fungus' putet



**Agartala, May 22, 2021**

(Agencies): Hokolbarnü Tripura nung nisung ka dak Mucormycosis mesüra 'black fungus' putetogo, ta sorkar otongdar aser Education Minister Ratanlal Nath-i ashi.

Covid-19 puteta aliba arishi küm 68 tain tetsür ka dak Agartala nung nija mozü ki ka nung 'black fungus' putet.

Iba nisung ya ILS Hospitals, Agartala nung anepaludar, ta Minister Nath-isa ashi.

State sorkari Epidemic Diseases Act, 1987 kübok mucormycosis mesüra black fungus ya notifiable disease ka asütsü züngokogo, ta paisa

shisem.

Centre sorkari iba tashidak ya wara ka ta sangoktsüogo, ta Family Health & Preventive Medicines Director, Dr. Radha Debbarma-ia ashi.

"Tripura sorkari GBP Hospital aser Tripura Medical College Hospital nung shirangertem anepalutsü renemogo. Centre nungi shidi anguba sülen teinyaktsü ajak inyakogo" ta Dr Debbarma-isa ashi.

"Covid hospital ana- GBP Hospital aser Tripura Medical Hospital nung black fungus agi shirangertem anepalutsü" ta laisa shisem.

## Dibrugarh nung Covid-19 aketer tetsü kati jakrep aso



**Dibrugarh, May 22, 2021**

(Agencies): Assam kübok Dibrugarh nung Covid-19 puteta alir tetsü kati tanur jakrep ka aso.

"Covid-19 puteta alir tetsü kati jakrep asoba ya asenok ajak atema osang tajung lir. Ni lar kibong aser medical staff nem tenüsang agütsür" ta Assam Medical College and Hospital (AMCH) Principal & chief superintendent, Dr. Sanjeeb Kakati-i ashi.

"Jakrepji tebur ka aser tetsü ka lir aser tenaprong temang junga dang aser Covid negative lir. Arishi küm 34 tain tetsü ya Dibrugarh kübok Moran nung alir aser küm 14 tashi tanur mesoteti aruba agi IVF technology agia liasü" ta Kakati-isa metetdaksü.

May 19 aonung la temang nung timtem ka adokba agi Dibrugarh nung nija mozü ki kati anir ao.

"La temang tendangdang Covid aliba putet aser iba jagi Assam Medical College-i anir

aotsü ashi. La temang kanga mejungi akümba ajiteta Genealogy & Obstetrics department tekolak Dr. Ramesh Sonowal-i anir doctor aser nurse telok kati C-section agia jakrep sotsü" ta Dr Kakati-isa ashi.

"Tetsü aser tanurtem ajak junga dang lir. Jakrepji neo-natal care unit nung anepaludar. Tena mapang agi matong hopta 35 nung dang asoba agi jaundice madoktsü atema phototherapy agütsüdar" ta paisa shisem.

Assam health minister Keshab Mahanta-ia AMCH nung doctor aser nurse tem nem tenüsang agütsüogo.

"Covid puteta aliba tetsü kati IVF ajanga jakrep asoba sülen ajonger noksa agiba angudang kanga pelar. AMCH Dibrugarh doctor aser nurse atema nüma atanger" ta Keshab Mahanta-i Twitter nung metetdaksü.

Külen, Hokolbarnü Dibrugarh nung nisung 367 dak Covid-19 aliba puteta liasü.

## Mizoram nung Myanmar nung 5,600 tema jenoka lir

**Aizawl, May 22, 2021**

(Agencies): Myanmar nung February 1, 2021 nü mitkartemi sorkar atsüngdokba sülen nungi Myanmar senso 5,600 tema Mizoram nung arua jenoka lir.

Parnok rongnung MP 18 dena lir aser nisung 100 tashi meyipa ogo, ta police ketdangstür kati ashi.

Mizoram Police Crime Investigation Department (CID) ajanga Myanmar refugee tem maparen repranger aser

parnoki ashiba agi Myanmar senso 5,673 jenoka lir.

Myanmar den arrtsü anasa alibadistrict Champhai nung nisung timtiba (3,170) jenoka lir, ta parnoki metetdaksü.

National League for Democracy (NLD) party nungi Member of parliament 18 tashi state nung jenoka lir, ta police ketdangstürisa ashi.

Myanmar senso timba ka nem local NGOs aser kar yimdaklirtemi chiyungtsü

agütsür, ta paisa shisem.

Mizoram kübok district 6-Champhai, Siaha, Lawngtlai, Serchhip, Hnahthial aser Saitual-i Myanmar den kilometre 510 tashi arrtsüa lir.

Myanmar senso kar dak Covid-19 putetogo, ta Covid-19 atema state spokesperson Dr. Pachuau Lalmalsawma-ia ashi.

Myanmar nungi arishi küm 61 tain tantsür ka May 17 nü Covid-19 agi asü, ta paisa shisem.

## Jan 21 nü Meghalaya nung Captain Williamson Sangma Technical University lapoktsü

Captain Williamson Sangma Technical University



**Shillong, May 22, 2021**

(Agencies): January 21, 2022 nü Captain Williamson Sangma Technical University lapoktsü ta Meghalaya chief minister Conrad K. Sangma-i metetdaksü.

Meghalaya State ngur küm 50 abensaba anogo nung iba University lapoktsü.

Hokolbarnü chief minister Conrad-i State University yangluba semdanga liasü aser mapa inyakba nung temolung asüba ashi.

"Mapa 80% tashi renemogo aser taküm October tashi nung

ajak tembangtsü imlar" ta pai metetdaksü.

PWD department danga campus-i aoba approach road yanglutsü shiogo, ta Conrad-isa ashi.

South West Garo Hills kübok Balalgre nung iba University ya Rs. 16.96 crore endoka yanglur.

Iba University ajanga technical den engineering courses nung yaritsü, ta chief minister-isa ashi.

Iba ya mezüngbuba State University lir aser Meghalaya nung mezüngbuba chief minister

asür Captain Williamson A Sangma tenüng jaloktsür.

"Sangküm asen state küm 50 abensatsü aser iba benjung den külemi state nung terenlok mapa 50 sayatsü. Iba benjungmong nung Captain Williamson Sangma University adentsü" ta Conrad-isa ashi.

Yashi Tura Lok Sabha MP Agatha K. Sangma aser North Tura MLA Thomas A Sangma nati Conrad meiner senzü.

Chief Minister-isa College of Architecture and Urban Planning semdang. Iba reju yaa sangküm lapoktsü.



# TIR YIMYIM

## YIMOBILEM (EDITORIAL)

DIMAPUR AMUNGNÜ, MONUPII (MAY) 23, 2021

### Ni metsübuttsü!

**T**asü aküm ajanga oaga ni kecha metsübuttsü, kechiyong Kibuba kü den lir ta David-i Tsüngrem dang ashiba o yagi asenoki pa tamang metetter. Tanga o ka nung asenoki angatetdi süra, ni asütsüa ne kecha metsübur, kechiyong Kibuba kü den lir ta ashiba o lir. Iba o ya tanuri tsürabur aliba agi kecha metsübu jembiba o amai asenoki angatettsüa akok. Tanü tensa nung asenokia Tsüngrem dang Kibuba, na onok den lirji, onoki tasütsüa metsüburago ta shitetter asü masü, ta asenoksasa asenok tamang tendangtsü kanga nungdak kümogo. David ya tanur asü dang nungi tsükchir den raraa aruba nisung ka lir. Atangji, pa taküm nung shisamebulu pelaa aliba anogotem dang nungibo tejashi nung temulung zürepa aliba anogotemang teimba ser asütsü ta bilemer. Pa tanur asüba mapanga par tsüraburi pa dak maketba Tenüngsang Ken 27:10 nung shia angur. Par tsürabur, tetsü o tebu nati pa dak maketba otsüji talangka lir, kechiyong tebu David ya par chir masüa ta bilem. Iba ama kidang pei tsüraburi memeim mezüngmeshia intetba tia nungi, tanur süaka, pa kija arem moapu nung san telok tulu nüka jajaba mapang pa tsükchirji arem shiruru molusangzü aser shirem tesashitem liasü. Iba nung jagi tenzüka nisungtem rongnungbo pa tsükchir mezüngbuba aser tulutibaji Palestine nung aso tulu Goliat liasü südi. Pai Goliat den raradang David ya sannüker tanur ka dang, shingaia pa memetet, tedi nungertemi dena pa dak mesalok aser temulung melemtet. Ajisüaka, iba mapang nungji dena pai Israel Tsüngrem Kibuba pa den lir ta meteta dang liasü aser pai Saul chubai dena atentena tsüba aliba Goliat tepset. Iba nung jagiang Israel tsürtemia pa meteta aküm aser Saul chubai meyrirjang ka tepset saka David-ibo meyrirjang ter tepset ta ken mejema tenloksüba nungi tenük merem adoka Saul Chubai David tepsettsü merangba otsü asenoki meteta lir. David taküm nung pa taküm samatsüa tsükchir ajurubaji aji tatem masü, pa chuba kümer külena tangar bendanger tsükchirtem yutsür par jabaso Absalomi dena pa tepsettsü merang. Aji oda, David taküm ya arishi talangbaka pa tsükchirtem nungi jenshia arem nung senzüba asenoki Laishiba nung azünger. Iba ama pa tsükchirtemi pa taküm samatsütsü arishiba agiang David-i Tsüngrem den alitsü kanga merang südi. Iba jagi pai mejemba Tenüngsang Ken tapu aika nung Tsüngremjiang pa jenokdak long aser jung ta shia angur. Iba ama tetsübuttsü tia aika nungi Tsüngremi pa taküm kümzükba mamai pa tamang akangshir Tenüngsang Ken 23 ya pai zülu südi ta angateter. Ashiko, iba lai tekongtem nung shia aliba tasü aküm yabo pa taküm arishir tsükchir nisungtem indang ashir masütsüa akok, kechiyong tatem nung pai pa Kibuba kidang teti alitsüba indang shia lir. Aji oda, joko David tambur kümer külen, pai pasasa pa taküm arishi tatemleni arur ta meteta pai Tsüngrem dang sarasademba asütsüa akok ta laishirtemi ashir. Atangji, pai pa tasüba lendong ajurutsü ta meteta dang lir, iba jagi tamajungba lendong kodanga marutsü aser majurutsü ta masü saka ni kecha lendong metsübuttsü, kechiyong na kü den lir ta pai Tsüngrem dang ashi. Na kü den lirji, ni kecha metsüburago ta Tsüngrem dang ashidang, Tsüngrema pelar alitsü ta bilemer. Atangji, asenokibo Tsüngrem asenok den lirji lendong marutsü aser tasübaa majurutsü ta bilemer. Ibaji asenoki kodang bilemdangdir, aji asen kija ajungtsü asoshi bilemba shisatsü lir. Nisungsa süaka asenok o David na sarasadem tepilaji yangji angatettsü. Tanü ama asenok lendong agi sünga aliba tensa mapang ka nung alidang, asenokia David sarasadem ya sarasademtsü nungdaker. Onok dangibo kenyongi lendong timtem teyok, teshirangdaksü, arishi talang kua, anema yujang ka kisung sarasademba masü saka Kibuba na onok den lirji tasüba tashidak agi menepiyonga onoki kecha metsübuttsü ta asenokia shitettsüla. Aji oda, asenoki asen - asen ajungtsü atema Tsüngrem dang shia lira, asenokbo sarasadem melendi aser Kibuba, na onok sannüker, onok jenokdak, onok jung aser lenisang, anungji kechi tia arudir arung, onoki metsübur, kechiyong na onok den lir ta shidi.

# OLEMSABANG

## COVID WARAPANGASERWARASÜLEN AROGO TEINYAKTSÜ KAR

~ Wati Longchar (Serampore)

(Yashi adok nungi...)

- B) **Long-term teinyaktsü:** Emergency crisis teti dangbo malir, mapang ka nungbo tempanga arur. Iba Covid tashidak yaa mapang ka nungbo koktettsü. Emergency mapa tembangba sülen, tanga nungi teyariarubaanenadoktsü, teyarir lokti balala oadoktsü. Saka Covid ajanga lajar kümdaktsür, kija rongjenseta kümdaktsür, mapa makai kümdaktsür, rongsen ketsüng nung tesama ajuruba pur asen den teti alitsü. Anungji Post-Covid pandemic sülenjiang shitakba arogo long-term teinyaktsüji tenzüker ta angatetdi. Covid wara sülen teinyaktsü aika lir, saka yangi pezü dang shiner:
- 1) Pei tsürabur, tanur, adianu, kiyonger asü-ama lendong ajuruba ajangashisabulua, tsürabur mali, tanur karboteyarir mali ni koda alima nung alitsü ta, tantsü-tamburkarbo kija rongjensetaalitsüa akümstsü. Iba mapang arogoi pulpit nungi khen sayutsüngiba, khen oa sarasademtsüba jagi teperi masütsü. Item purji community support, concern, teyari, temeim, aser parnok azüngmeyaka meyutsüi mapang shia semdanga, koda lir? shia tebuluni ta aria bilema anizüngzük o agi nungitbaji parnok asoshiteyari tulutiba asütsü?, aser iba dangji pastoral care ta ajar. Pastor aser toklang tenzükeri mayimjemtsü, anungji arogo nung "community support pastoral care and counselling" tenyaba mapa ya kanga tongtibang, aser koma inyak nung nübur tanela aser shi temang nung anizükangutsü iba lemangji bushitsüla. Arogoi pulpit ministry atena oa item mesükba tenyaba mapa koma inyaker aji arok aroka shisadangtsü mapang tajung ka Covid-i bener arutsür.
  - 2) Meimchir ya kanga dang merumeru aser rongsen agi kodanga tenük masungba shilu ka asü anungji, nisung kar asoshibo lendong mapang ya rongsen bendenba mapang tajungtiba. Mozü miima jenjang tur ayokba; fake mozü aser vaccine yanglua ayokba, mozü kidang yipten miima shishilembaba, oxygen miima ayokba, süpokrem agütsür külenangtsü temang rongtsüba, shiranger junga anebalu mesüi südaktsüba aika ajangshia aruogo. Yimden yimsütsüba akoktsü mechi SOP mamshi election nung mass rallies ayongba, Hindu tamangba yimsü asoshi noktaker ta sayutsü asoshi BJP Govt.i khamb mela mekokdangi Covid prokshidaktsütsü, a.a. Item ochi mashi mapatem ajanga nüburtem, talisa sensaker aser nungdakba pur tasü lendong ajurutsüsa akümer. Item oshimashi mapa anema ola madokra tali dang züintsü, anungji item ochimashi aser tim masüba mapa anema ochi ola arogoiteti adoktsüla. Arogoji ochi kuli tasü ita kuli asütsü jatet ta angatetdi.
  - 3) City nung alir lanur shirnok meyipar aruogo, parnok mapa malir aika adoktsü. Lanur ka asoshi zünger mapa makai alitsüba shisabulu aser maksü tulutiba lir. Arogoi parnok timtem, shisabulu koma angateta yarir, Tsüngrem O sayur, pei sasa noktakteta litetba lemangkoma sayur? Hau, arogo aikati mapa tajung aika inyakdaki. Ano arogoi, pastortemi, youth teloki, tetsür teloki mesüra NGOs balala den sendaktepa lanurtem pei sempet dak apet inyaktettsüba lemang balala bushitsüla, sayutsüla, aser mapa tasen tenzüksüla aser ibai arogo mission tongtibangji ka ta metettsüla. Skill oriented training balala, smart farming mapa amala nung arogo shilem tulu lir ta ajiteter. Tanela maparen dang masü koda shi temang kümzüka ayutsübamaparen nung arogoi koda shilem agir aji meyipar repringshitsü mapang tajung ka Covid-i bener arutsür.
  - 4) Arogo tenyaba nung teinyaktsü tongtibang kaji healing ministry ya lir. Nisung aikati healing ministry ta süra, tanela ain aser sarasadem ajanga shiranger tanebtsüba ya dang amai bilemer. Hau aji tongtibang. Iba denji arogoi hospital-a lapoktsüla. India lima nung hospital aser medical college aika Khristantemi lapokba angutsü. America nung missionary Nagaland nungi or külen arogoi lapokba hospital kata mali, medical college kata mali. American nung missionary-temi lapoka yutsüba karbo shibangogo aser kar tasür dang lir. Anungji arogoi khen healing ministry nung asentenshitsü nungdak ta Covid wara ajanga ayongzüker. Ibaji arogo mission mapa rongnung tongtipangtiba ka lir ta angatetdi.
- Ao arogo küm 150 ajungba benjung 2022 amongtsü aser iba nükla nung item mapatemji khen meyipar repringshir asentenshia inyaktet nungbo Covid warai temoatsü bener arutsüba tulutibaji aji asütsü. Covid wara ajanga arogo dang tenyaba mapa tasen inyakang ta ashir ta angateta tenzüka mapa tasen nung amdakdi ta ayongzüker.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## India nungger Jesuit putir, Stan Swamy maneni tepuokdak ayutsü



**Kochi nung Khristantemi Jesuit putir, Stan Swamy tepuokdak nungi chiokang ta takhangba agütsü dang tangokba noksa nung angur.**

**Mumbai, May 22, 2021 (Agencies):** Arrshi küm 84 Jesuit putir, Stan Swamy-i pa bail nung tepuokdak nungi chioktsü atema temepishiba ken o ka agütsü, ajisiüaka Bombay High Court-i maneni iba ken oji taruba ita nung ang angadangtsü lemtetogo, anungji pa temang tamajungba akümyonga pa maneni tepuokdak ayutsü.

Maharashtra nung state court-i bail temepishiba ken o ya May 21 nü angadanga mapang nung Khristan putir Swamy Mumbai nung aliba sorkar hospital mesüra private hospital ka nung yaritsü metetdakja liasü.

Ajisiüaka court-i pa hospital nung yaritsü tuyubaji magizüki pai, ni Ranchi (Jharkhand yimtiba)-i oa kidang temang anepaluner, ta metetdakja liasü.

Swamy temang tamajungba akümba agi tepuokdak nungi chioktsü atema bail temepishiba agütsü saka court-i maneni iba ken oji June 7 nung ang angadangtsü lemtet.

Putirisa video conferencing ajanga court dang pa Mumbai nung aliba Talaja Central Jail

nung temang tamajungba akümer, ta metetdaktsü.

Putir Swamy dak Parkinson tashidak lir, tenarongi junga mangashir aser tambur akümba agi temang nung timtem balala lir. Yaküm October 8 nü pa Ranchi nung par kidang lia apuba sülen October 9 nü jail nung puoka liasü.

Pai ashiba agi, pa mezüing jail nung puokba mapang nungbo pa temang junga liasü saka tanemtanemi temang nung timtem aika adok.

"Taloja jail nung ni joko mezüluteter mesüra kü mesasa mejajateter. Tamasabo ni kü sasa chiyungteta liasü, züluteta liasü, jajateta liasü aser tzi chigoteta liasü, ajisiüaka tangbo ni kecha mesüteter," ta pai metetdaktsü.

"Ni temang tamajungba akümba shisadangtsü atema ni mepishir. Ni judiciary dang kü nem interim bail agüjang ta mepishir," ta pai court nem metetdaktsü.

Ajisiüaka court-i, tangtangbo pa Jharkhand-i meyipa meyoktetsü saka Mumbai nung

aliba sorkar/nija hospital ka nung treatment agitsü akok, ta metetdaktsü.

May 19 nü putiri züluba bail temepishiba ken o court nung angadanga mapang nung court-i pa temang check-up agitsü tuyua liasü, iba sülen health report nungji ajemdaker court-i jail ketdangsertem dang pa junga anepalutsü tuyu.

Jesuit putir, A. Santhanam-i, "Tang tashi check up agiba health report magütsür. Ajisiüaka pa dak coronavirus bo meputet asütsüa akok, kechiyong pa quarantine nung mayu," ta ashi.

"Ken o angadanga mapang nungsa Swamy-i jail nung tangartem timtemba-a metetdakja liasü, kechiyong pa ya tangar atema-a bilemstüba nisung ka lir. Ibayongji pai putir inyaker aser linük nung khuret abenba senso tajung ka ama inyaker," ta Santhanam-i ashi.

Swamy-i linük anema inyakogo aser Maoists telungpurtem den tesendaktep ayur, ta tai tonglokja National Investigation Agency (NIA)-i pa pua liasü.

## Mission Aviation Fellowship-i sensakertem nem vaccine agütsür

**May 22, 2021:** Khrista osangtajung prokba Khristan charity telok- Mission Aviation Fellowship (MAF)-i alima nung sensaker linüktem nung coronavirus vaccine agütsüba maparen tenzükogo, aser tang tashi nung parnoki linük pezü nem vaccine agütsüogo.

Osangbener den jembidang MAF CEO, Dave Fyock-i, "Onoki tayimtsü tila amshia kanga tezülen aliba tesemtemi aoer. Onok nükjiongji kanga tezülen aliba nüburtem dang Khrista temeim sayutsü atema lir, aser iba mapa inyaksü atema onoki tayimtsü amshir," ta metetdaktsü.

Dave-isa, "Madagascar nung India nungger vaccine amshir. Vaccines alemtsü atema onoki cold chain nungdaker. Pfizer nungi tenzükker vaccine aika atema cold chain nungdaker, saka Russia nungger vaccine, India nungger aser China nungger vaccine atemabo temperature temekong

menüngdaker," ta metetdaktsü.

"Onoki tayimtsü amshia linük 27 nung inyaker. Iba denji külemi onoki linük balala nung sorkar kübok inyaker. Anungji tang tashi nungbo onoki linük pezü nung dang vaccines agütsüogo. Linük aika nung yimitem nungbo vaccines alitsü saka kanga tezülen aliba tesemtem nungbo vaccine mali. Anungji onoki tayimtsü ajanga vaccine lema agütsütsü renema lir, ajisiüaka tang tashi nungbo onoki linük pezü nung dang vaccine agütsüogo," ta pai metetdaktsü.

"Alima nung kanga sensaker linük 92 nung UN-i agütsüba vaccines rongnung COVAX densema lir. Sangküm küm tomnen tashi nung ang linük aikati vaccine ngur alitsü," ta pai ashi.

Vaccine alemba maparen nung Khristantemi yariteptsü akokba dak sendakba nung pai, "Tamasa asenoki sarasademtsüla. Nüngdakba

tesemtem nung vaccine agütsütetsü atema asenoki (Khristantem) shilem tajung agitetsü atema Tsüngrem dang sarasademtsüla. Tanabuba nung, coronavirus agi kongshiba ya mapang talangka alitsü. Anüolen alirtem tebok sünga lir, anungji vaccine ajanga tebilemstü ajak akoktsü ta bilemer, ajisiüaka linük aika nung coronavirus nokdangtsü atema linük shibangba ajanga nisung aika tebok masüng ayar. Sensakertembo shisaliok toktür chiyungtsü mesüra mozü-a mangur. Papa New Guinea nunga school aika shibangogo, kechiyong kaketshirtem mesütsü atema parnok ket nung supplies mali," ta metetdaktsü.

"Anungji tenla agütsüba ajanga yaritsü akok. Tayimtsü amshiba nung senjenti indoker, anungji iba ministry nungita onok yaritsü atema MAF nem tenla agütsütsü akok," ta paisa shisem.

## ANOGO ABEN TSÜNGREM DEN

### MESASATSÜ JASHIDAKTSÜBA

**"Kechiyong Tsüngremi mulungba amato jashidaktsüba agi tanaben mesasatsü tekümtet asoshi temulung meyipdaktsür. Saka alima tejashibai tasüba adokdaktsür". 2 Korint 7:10**

Yisu alima nung alidang tesüngmangtsü mapa aika inyak. Saka Yisu indang tongtipangtibaji tesayubaji samar aliba menenpur ka temulung meyiptsü aser taküm tasen poktetbaji lir. Temulung meyiptsü indang Yohan Baptitsüba, Yisu nütsüngtem aser tejen lai nung ainkartemi nüburtem dang sayutsüngi. Temulung meyipbaji alima yimya ama jashiba masü, rongsen agi anüngba asoshi mepelaba masü, asüama ajurudang temulung raksaa ajepba masü, taküm junga melitetba asoshi jashiba masü, piladang menungraa ajepba masü.

Saka nisung ka temulung meyipba nung tatok nangzükba aser Yisu Khrista pei kümtetdakba aser Kibur ta nangzükba aser temenen nungi pilaba, koba ajanga tekümtet angur. Grik oshi nung temenen nangzükba ojangji metanoia: tetezü temulung melenshiba. Temulung melenshiba ajanga taküm melenshir. Temulung meyipba nung teyanglur Tsüngrem anema inyakba mapatem, Pai ashiba mangaba asoshi, Pa nungi pilar tazükba maka pei sünütsü süa aliba asoshi jashia bilemba aser item mapatem asoshi tatok nangzükba aser tanaben meinyaktsü mulungtetba. Mesasatsüji asoshi iba lai tekong nung jembir. Sasaba asoshi mozü kecha mali mesüra sasaba ajanga tanaben jenjang yanglushitsü maongka mangur.

### SARASADEM

**Oba Tsüngrem ni kodanga mesasatsüsa kü menen asoshi teti jashia bilemdakjang. Amen**

## Burkina Faso nung Baptiba sentongka nung Khristan 15 khaset

**May 22, 2021:** Mongolbarnü (May 18, 2021) Burkina Faso nung Jihad kiralongrartemi Khristantem Baptiba sentong ka tagidak mapang nung Khristan 15 khasetogo, ta osang ka ajanga metetdaktsü.

Burkina Faso kübok Sahel region nung governor, Colonel Salfo Kabor-i, Oudalan province kübok Mali arrtsülen kiralongrartemi Khristantem Baptiba sentong tagidak mapang amak, ta metetdaktsü. Ajisiüaka tang tashi nungbo koba teloki amakar mejangja.

Osangbener den jembidang Tin-Akoff nung alir kati, "Nisungtem tsübuteper aser aika jenshiogo," ta metetdaktsü. Tang tashi nung telok shingiaia Khristantem amakba menanzükker, ajisiüaka taküm küm tetenzüklen nungi West Africa nung Al-Qaeda aser Islamic State den tesendaktep aliba kiralongrar telok balalai timtem agüja arudar.

Mapang ka nungbo Burkina Faso ya tamangba yimsü balala amangertem ajak tesünep nung litetba linük ka liasü, ajisiüaka tawa Jihadist kiralongrar aser telungpur telok balalai yimsü

anema inyakba den külemi meimchir temeden alema inyaker.

Kiralongrartemi sorkar dang masü saka civilians, talisa Khristantem aser Khristan lenirtem anema inyaker, aser Tenla kitem raksatsür.

"Taoba ita nunga Burkina Faso kübok Tin-Akoff nung civilian aika tepseta liasü. April ita nung Spain nungger osangbener ana densema nisung 50 tepset," ta Voice of the Martyrs USA nung otongdar, Todd Nettleton-i metetdaktsü.

"Kiralongrar teloktem arrtsü adena arur amaker aser Mali-i jena aoer. Khrista nung asen adianu 15 tashi tepsetogo. Iba tebilemstü atema karibo inyaktsüla," ta Nettleton-i ashi.

"Burkina Faso nung Voice of the Martyrs-i inyakba mapatem rongnung kaji- reshikangshi atema Arogotem renema lidaktsüba nung yariba lir. Onoki pastor tem nem Tsüngrem O nung shia aliba reshikangshi indang angatetdaktsür, ibaji ajanga pastor temi Arogo züngsemtem nema reshikangshi indang angatetdaktsütsü," ta paisa metetdaktsü.

**OLONG PAITEP # 5820**

1			2			3			4	
			5		6		7			
8										
			9							
	10									
								11		12
			13				14			
15						16				

<b>TIPIEN</b>		<b>LANGTSÜNGLEN</b>	
1. Anenzükdak ki	- (5)	1. Reprangdaksü	- (4)
3. Asür mangyimba	- (5)	2. ___ ur	- (3)
5. Temulung nung shisadang	- (5)	4. Kiojen yangludak	- (6)
8. T ___ lu	- (3)	6. _____ ait	- (7)
10. Takdang temalen	- (9)	7. Nagaland nung ayong ka	- (5)
11. Tesa ___ a	- (3)	9. Küm kasa purtem	- (5)
13. Ajungbena temulungjang		10. Tetsüng tajemtdak	- (6)
tongtonglatsü atu	- (5)	12. _____ adenshi	- (4)
15. Tejen lai nung tesayur	- (5)	14. Tsünüsenbongtsü adokdak	- (3)
16. Tsüngsak-mopung	- (5)		

**OLONG PAITEP # 5819 TELANGZÜBA**

<b>TIPIEN :</b>	<b>LANGTSÜNGLEN :</b>
1. Kasa, 6. Rangben, 7. Mait,	1. Khu, 2. Süjak, 3. Onük, 4. Oba,
9. Poktet, 11. Ati, 13. Atasa, 16. Rür,	5. Anü, 6. Rätet, 7. Mozü, 8. Ita,
17. Rajang, 20. Lanu, 24. Nüngjem,	10. Tar, 12. Tinu, 14. Salem, 15. Aja,
25. Süra.	18. Anünü, 19. Tajü, 21. Ano, 22. Onü,
	23. Kua.

**KOMA SÜLA TELANGZÜBA**

Q. Covid mozü kidang inyaker doctor, nurse aser staff-tem asoshi anogo shia chiyongtsü mozü ki anasa aliba arogotemi longjemer agütsü nunga koma süla ?

Mapang ka lokti tentet aikati rongsa-soa tenlatepa inyaker-mesodang, karbo anemsü agi menüremba asenoki ajangshiogo. Alima nung tarutsü anogotem asoshi rongsen bendener tapu ana. Kaji shidakba pei agitsü bendener, saka karbo tangar asoshi-ang bendentsür. Asenoki item dak temulung meyuli, saka tagitsü arishia, takoker-ibo mulungsoa tenlatepa tarutsü aogotem asoshi rongsen bendener rong-nung adentsü Koda jangratemtsü.

- WhatsApp

Doctor, Nurse, aser mozü ki nung inyaker staff ajak nem chiyongtsü agütsüsbaji mozü ki anasa aliba telungtet arogoi dangbo metizüktettsü. Anungji Dimapur Dist. ajunga nung aliba arogotem ajak longjemer anogotem lemsar agütsü nung kanga dang ajungtsü arogo tulu tilaji anogo esap sür lemsatsüla aser iba mapa inyaksüsbaji takoktsü lir.

-T. L Chumu Dmr

**TANÜBO NAI LANGZÜANG**

Q. Atlas V \_\_\_\_\_ indang launch vehicle lir.  
 A.NASA      B.ISRO      C.JAXA      D.ESA  
 \_\_\_\_\_ (Taruba adok nung onoki langzüsü)  
**YASHIADOK TELANGZÜBA:** Thailand and Malaysia

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Jadok**  
 (v) tzü tatsük akümba agi sünger endokba (overflow due to heat)  
 \* Kübui junga mereprangba agi mamatzü **jadok**.

**Jala**  
 (n) kibong nung asoba tetsür ( daughter)  
 \* Ozü **jala** asem lir.

**NAI-A YA METETTER MA?**

**ALIMA NUNG TAKATIBA (BILLIONAIRE) NISUNG KAR: Bloomberg Billionaires Index MAY 2021**

(Total Net Worth)

1. Jeff Bezos	\$187B
2. Bernard Arnault	\$162B
3. Elon Musk	\$162B
4. Bill Gates	\$142B
5. Mark Zuckerberg	\$118B
6. Warren Buffett	\$109B
7. Larry Page	\$105B
8. Sergey Brin	\$102B
9. Larry Ellison	\$91.1B
10. Steve Ballmer	\$88.7B
11. Francoise Bettencourt Meyers	\$87.6B
12. Amancio Ortega	\$83.1B
13. Mukesh Ambani	\$77.0B
14. Gautam Adani	\$69.0B
15. Zhong Shanshan	\$68.0B
16. Charles Koch	\$64.0B
17. Julia Flesher Koch & family	\$64.0B
18. Jim Walton	\$62.6B
19. Rob Walton	\$62.1B
20. Alice Walton	\$60.7B

**SUDOKU # 5863      TELANGZUBA # 5862**

	2	4					7	1	8	2	4	9	6	5	7	3				
7	6						8	2				9	5	4	7	3	2	1	6	8
8	9		7	4								6	3	7	8	1	5	9	4	2
5	8				6							8	2	1	9	6	3	4	5	7
			5	9		6	4					7	4	9	5	2	8	6	3	1
9			2	7	8	1	5					5	6	3	1	7	4	8	2	9
4		9				7	6	5				2	9	6	3	4	1	7	8	5
3			1	6	7			9	2			3	1	5	6	8	7	2	9	4
6	7	2			4			8				4	7	8	2	5	9	3	1	6

**OJANG LUTEP # 5406**

ENKH :

ANGILEMEBMDI :

BIBJEMA :

ÜRMESE :

AKBINYA :

GNUN :

ETTI :

OSHASI :

ÜSENSMERHITSA :

ÜMEAKR :

**OJANG LUTEP TELANGZÜBA # 5405**

TAKÜM NUNG TAKOK BALALA AJURUDANG ASÜKÜMA  
 BILEMRA KODANGA TATEM MATONGTSÜ

**TAN HOPTA ATEMA - KOMA SÜLA ?**

Q. Tenla ki shibangtsüba masü lokti sentep malitsü ashiba dang, anungji asenok arogo shia nung lokti sentep mali tashi tenla ki azünga metoktsüi nisung ishishi lemsar kena manen sarasademba yinzü, Chain of Prayer, sentong tenzük nunga koma süla ?



New Delhi, May 22, 2021: Delhi nung coronavirus positive shilem ajema 3.58% dang kumogo. Honibarnü Delhi nung nisung 2,260 dak coronavirus putet aser ibaji takum March 31 nungi tenzüka tang tashi nung anogo ka kija nung coronavirus case tajemtiba putetba lir.

### Küm matemdangsa tain ajak nem vaccine agütsütettsü: Harsh Vardhan

**New Delhi, Monupii/May 22 (Agencies):** India-i taküm küm matemdangsa tain nütsung ajak nem coronavirus vaccine agütsütettsü, ta Union Minister of Health & Family Welfare, Harsh Vardhan-i metetdaksü. States aser UTs 9 nung coronavirus vaccine agütsüba jenjang asadanga senden nung jembidang Health Minister-i, linük nung vaccine agi peritsü atema vaccine yangluba company tem den sorkari akok tashi yaritepdar, ta metetdaksü. Vardhan-i, taküm July ita tashi nung coronavirus vaccine

dose crore 51 alizüktsü, aser August ita nungi December ita tashi nung vaccine dose crore 216 alizüktsü, ta metetdaksü. Paisa state tem dang vaccine tekaraba nung agütsütsü aser Centre sorkari agütsüba vaccines shilem 70 bo tanabuba dose atema ayutsü metetdaksü. Honibarnep tashi nung linük nung coronavirus vaccine dose crore 19.73 agütsüogo. Senden nungsa Harsh Vardhan-i states aser UTs ajak nung covid tensa indang metetdaksü. State tilatem nung

coronavirus kanga bulua putetba dak sendakba nung pai, Goa nung tang teshirangdakpur 22,000 dak tema lir, ta metetdaksü. Daman & Diu nung teshirangdakpur kanga ajema 366 dang kumogo aser Ladakh nunga teshirangdakpur 1,500 dang kumogo, ta pai metetdaksü. Pai state tem dang coronavirus tendangba, track asüba, treatment aser vaccine agütsüba den külemi wara anema tetuyubatem shidak beshitsü metetdaksü.

### India nung ano nisung lakh 2.57 dak Covid putet aser 4,194 asü

**New Delhi, May 22 (Agencies):** State aser Union Territory aika nung coronavirus case tajemba akümiba mapang tesüiba ghonda 24 tsüngda India nung ano nisung 2,57,299 dak coronavirus putetogo; tanü agi anogo troknübuba linük nung coronavirus case lakh 3 den tajemba puteter, ta Honibarnep Union Health Ministry-i metetdaksü. Tesüiba ghonda 24 nungsa India nung coronavirus tashidak agi nisung 4,194 süogo; tang tashi nung linük nung nisung ajak agi 2,62,89, 290 dak coronavirus putetogo aser iba tashidak agi asür ajak agi 2,95,525 jungogo, ta Health Ministry-i metetdaksü. Hokolbar tashi nung linük

nung nisung ajak agi 19,33,72,819 nem coronavirus vaccine agütsüogo aser tang coronavirus agi teshirangdakpur 29,23,400 dang kumogo, aser ibaji coronavirus caseload nungi shilem 11.12 dang lir. Iba tashidak agi shiranger shilem 87.76 (2,30,70,365) anepogo aser iba tashidak agi asür shilem 1.12 kumogo, ta Ministry-i metetdaksü. Honibarnep Indian Council of Medical Research (ICMR)-i ashiba agi, May 21, 2021 tashi nung linük nung samples ajak agi 32,64,84,155 tendangogo, aser iba nungji Hokolbarnü samples 20,66,285 tendangba densema lir. Tesüiba ghonda 24 tsüngda

coronavirus tashidak agi asürtem (4,194) rongnung Maharashtra nung nisung 1,263 asüba, Tamil Nadu nung 467, Karnataka nung 353, Delhi nung 252, Uttar Pradesh nung 172, Punjab nunga 172, West Bengal nung 159, Kerala nung 142, Rajasthan nung 129, Uttarakhand nung 116, Haryana nung 112, Andhra Pradesh nung 104 aser Chhattisgarh nung nisung 96 asüba densema lir. India nung coronavirus tashidak agi nisung timba asüba state temji Maharashtra (86,618), Karnataka (24,207), Delhi (22,831), Tamil Nadu (19,598), Uttar Pradesh (18,760) aser West Bengal (14,054) state tem lir.



Patna, May 22, 2021: Maharashtra nung oa aayangertem Honibarnü Bihar yimtiba, Patna nung aliba railway station tonga aruba sülen coronavirus tendangtsü atema tarensena nokdaka aliba noksa nung angur.

### Cyclone Yaas atema West Bengal sorkari kanga mazüangi renemdar

**Kolkata, May 22 (Agencies):** West Bengal sorkari Cyclone Yaas indang tekümdangtsü osang metetdaksüba sülen East Midnapore district kübok tzüyinkümlen aliba Digha, Mandarmoni aser Tajpur nungi angopurtem tzükümi meyipa aruogo. Yipru mopung tesashi arutsü aliba nung ajemdaker sorkar ketdangsertemi angopurtem dang angopui maotsü metetdaksüba sülen angopurtem aika tzükümi meyipa aruogo. Lendong mapang kumzükba maparen inyaksü atema tang state kübok Kolkata, Howrah, North 24 Parganas aser South 24 Parganas district tem nung National Disaster Response Force (NDRF) team 12 lezmüktsüogo. State sorkarisa Irrigation, Municipal Corporation, Municipality, PHE aser Health Departments dang iba yipru atema renema alitsü tuyu. District administrations dang Cyclone Centres amenoktsü aser item centres nung masks aser sanitisers peria ayutsü

metetdaksü. India Meteorological Department (IMD)-i, May 26 anepdang Cyclone Yaas Odisha-West Bengal tzüyinkümlen süitsü, ta metetdaksüogo. Iba dak sendakba nung May 23 nungi May 26 tashi angopurtem dang central Bay of Bengal -i angopui maotsü metetdaksüba den külemi May 24 nungi May 27 tashi north Bay of Bengal aser Odisha tzüyinkümleni angopui maotsü metetdaksü. May 22 nü IMD-i sangdong ka ajanga, "Asüng, May 23 anepdang tashi nung east central Bay of Bengal nung low pressure area nung yipru tesashiba akümtsü, iba yipru ya north-northwest tsütsüleni oa May 24 tashi nung Cyclonic yipru akümtsü, iba sülen ghonda 24 tsüngda ano kanga tesashiba akümtsü," ta metetdaksü. "Iba yipru ya May 26 nikongdang tashi nung West Bengal aser north Odisha den Bangladesh tzüyinkümlen süitsüa akok," ta IMD-isa metetdaksü.



New Delhi, May 22, 2021: Honibarnü New Delhi nung osangbenertem senden ka nung Delhi Chief Minister, Arvind Kejriwal-i jembidang tangokba noksa nung angur. Vaccine peria maliba agi Delhi nung arrshi kum 45 tekükobpur nem vaccine agütsüba anena atar, ta Delhi Chief Minister-i metetdaksüogo.

### Coronavirus tanaben prokba sülen doctor 420 süogo: IMA

**New Delhi, May 22 (Agencies):** India nung coronavirus tashidak tanaben prokba sülen linük nung doctor 400 dak tema coronavirus tashidak agi shiranga süogo, ta Indian Medical Association (IMA)-i metetdaksü. IMA-i, coronavirus tanaben prokba sülen doctor 420 coronavirus tashidak agi süogo,

asürtem rongnung Delhi nungi doctor 100 densema lir, ta metetdaksü. Bihar nung doctor 96 aser Uttar Pradesh nunga doctor 41 süogo, ta IMA-i metetdaksü. Gujarat nung doctor 31, Telangana nung 20, West Bengal nung 16, Odisha nunga 16 aser Maharashtra nung doctor 15 süogo, ta IMA-i metetdaksü.

### Maharashtra kübok Gadchiroli nung Maoists telungpur 13 khaset

**Mumbai, May 22 (Agencies):** Hokolbar anepdang Maharashtra kübok Gadchiroli district nung state police C-60 commando temi Maoists telungpur 13 khasetogo. Hokolbarnep 5:30 ako meta dictrict kübok Kotmi nung aliba arem nung Maoists telungpurtem senden amentsü atema adenshia aliba tesem nung rara tenzük, ta Gadchiroli district Deputy Inspector General, Sandeep Patil-i metetdaksü. Sandip Patil-i, "Intelligence

osang ajanga lazükba nung ajemdaker C-60 commandos leniba nung police-i arem nung telungpurtem mita ao, ajisüaka telungpurtemi police anguba sülen parnoki tama injang khaloktsüba nungi rara tenzük, aser telungpur 13 khaset," ta metetdaksü. "Ghonda ka shi khatetpa sülen telungpurtem jena ao. Tesülen raraba tesem nungji telungpurtem tasüman angu aser police-i maneni telungpur mita odar," ta Superintendent of Police, Gadchiroli, Ankit Goyal-i metetdaksü.

## Nepal tiri parliament loksatsü; November ita election agitsü



Nepal President Bidhya Devi Bhandari

**Kathmandu, Monupii/May 22 (Agencies):** Nepal tir Bidya Devi Bhandari-i Hokolbar aonung ayaterem nung parliament loksatsüogo aser mid-term election November 12 aser 19 nü agitsü sangdongogo.

Ato Kilonser K P Sharma Oli-i parliament loksatsü atema benokba sülen tir Bhandari-i Hokolbar aonung ayaterem nung iba osang sangdonga liasü, ta osang ajanga metetdaksü.

Tir Office nungi sangdong ka ajanga ashiba agi, parliament loksatsüogo aser Constitution of Nepal, Article 76 (7) dak ajemdaker midterm election agitsüba anogotem sangdongogo.

Tir Office sangdong ajangsa, caretaker Ato Kilonser K.P. Sharma Oli mesera opposition lenir Sher Bahadur Deuba napronglai, Bhandari-i latetja aliba tatembangbuba anogo; Hokolbarnü tashi nung sorkar tasen kümtettsü atema majority mesayutetba sülen iba osang ya sangdongogo, ta ashi.

"Tir-i November 12 general elections mezüngbuba shilem aser November 19 nü tanabuba shilem agitsü atema House of Representatives loksatsü tetuyuba agitsüogo," ta Tir Office nungi sangdong ka ajanga ayaterem süier metetdaksü.

Council of ministers-i election mezüngbuba shilem November 12 nü aser tanabuba shilem November 19 nü agitsü atema benok.

Hokolbarnü Ato Kilonser K P Sharma Oli aser opposition party napronglai sorkar kümtettsü atema parnok

pusemerem sayua tir nem shiti kaka agitsüba sülen Nepal nung yimden yimsüsüba tsütsü mepetmesü adoker aliba lenmang tanga kati melener lir.

Opposition lenirtem mao tsüingda minute ishika jelia Ato Kilonser Oli tama Tir Office Shital Niwas tonga ao aser pa indang list agüja liasü.

Iba jenjang agiba indang political anaprongla nungi tang tashi nung osang kecha agüja mali.

Nepal nung tang Covid wara tanaben poktetshir anogo shia average nung nisung 8,207 dak tashidak potetba sangdonga aliba mapang ka nung yimden yimsüsüba nung mepetmesü adokogo.

China kübok tesem ana nung menoknok anok; nisung 2 asü

**Beijing, Monupii/May 22 (Agencies):** Northwest aser southwest China nung menoknok anokba sülen nisung ana süogo, ta local ketdangsürtem aser seismologists temi Honibarnü metetdaksü.

Northwest nung Qinghai province aser Yunnan province nung menoknok mapangshia anoker aser mapangshia teraksatsüba tulu bener arutsü.

Yunnan nung menoknok ya 6.1 magnitude nung Hokolbar aonung 9:48 pm nung Dali yimti anasa anok, ta US Geological Survey-i ashi. Iba sülen aftershocks ana tashi ajangshia liasü, ta USGS-isa ashi.

Iba tesem nung nisung ana tashi süogo, ta local ketdangsürtemi metetdaksü. Iba sülen state news agency Xinhua-ia, menoknok lendong

nung nisung 22 yiruba metetdaksa liasü.

Mezüngbuba menoknok anokba sülen ghonda ishika dang lir kilometres 1,200 pilar 1804 GMT nung 7.3-magnitude kati northwest China nung Qinghai province anokshitsü aser iba sülen ano aftershock arua liasü.

Iba tesem nung menoknok anokba sülen nisung asüba mesera yiruba indang osangbo kecha mali. Xinhua-i ashiba agi, epicenter ya Maduo County nung liasü aser ketdangsürtemi ki kar dang raksar alitsü ta bilemer.

Emergency personnel aser disaster relief team tem iba tesem anapronglai yokogo, ta agency-i ashi.

Yunnan nung provincial sorkari ashiba agi, ki kar chirepogo aser kar raksago aser iba tatalokba maneni asadangdar.

Nisung 20,000 dak tema iba tesem nungi aninogo, ta kasa sangdong ajanga metetdaksü. Iba tesem nung nisung 100,000 dak tema alir aser parnok timba yimdam yimtsüngtem nung alir.

Local media-i sayaba video tem nung tsüingbang nung milen inzüba aser sadem nungi chipo anopo tsükba sayuba den menoknok akokba sülen nisungtem kimai asemtepa tuguba nguogo.

China Earthquake Networks Center (CENC)-i, Weibo ajanga nüburtem dang ki tulu sür aliba nungi pilaa alitsü tekümdangtsü metetdaksüogo.

CENC-isa, menoknok tesashi arutsü lia ghonda tesadang ka tejakdang menok tilala ishika arua liasü, ta ashi.

China nung mapang shia menoknok agi kongshir aser talisa anüolen aser anüolen tip nung menoknok agi kanga kongshir.

2008 küma Sichuan province nung 7.9-magnitude menoknok ka anok aser iba mapang nisung 87,000 asü mesera samaa liasü.

2003 küma February ita Xinjiang nung menoknok anokba lendong nung nisung 268 asü aser 2010 küm Qinghai nung menoknok anokba sülen nisung 3000 asü.

Maneni 2014 küm October ita Yunnan nung menoknok anokba sülen nisung noklang aika yiru aser nisung 100,000 dak tema tangaleni jenshia ao.

## Suu Kyi yakta temai adoktsü: Myanmar junta

**Yangon, Monupii/May 22 (Agencies):** Myanmar junta lenir Min Aung Hlaing-i, Aung San Suu Kyi kidang anema lir aser la anogo ishika sülen okadak nokdaksü, ta ashi. February 1 nü military-i sorkar atsüngtokba sülen pai tang mezüngbuba interview ka nung shilem agia liasü.

Military-i sorkar atsüngtokba ajanga Myanmar nung mepetmesü tulu adoker lir aser junta anema telungpur telok balalai Honibarnüa northwestern jade mining town nung military post ka makogo, ta local media sangdong ajanga metetdaksü.

Taoba military yimsüsüba anema nokdangba atema Nobel Peace Prize ngur alila Suu Kyi ya coup sülen military-i pua alir nisung 4,000 rongnung densema lir. La ket nung ozüing alema walkie-talkie radio yua aliba aser state secrets law nung aibelenba atema la aija lir.

"Daw Aung San Suu Kyi anema lir. La lar kidang lir. La anogo ishika lir okadak nokdaksü," ta Min Aung Hlaing-i May 20 nü Hong Kong nung amendaker aliba Phoenix

Television dangi yokba video link nung ashi, koba Honibarnü sangdonga liasü.

Sensaksem lenir-i pa dang Suu Kyi inyakim paia koma bilemer ta asüngdangba mapang, "lai takokba tashi merangdangogo," ta Min Aung Hlaing-i langzü.

Paisa, November ita Suu Kyi'er party-i akokba election nung ochi mashi inyakim aliba potetba ajanga army-i sorkar atsüngtoktsüsa aküm ta ashi, ajisüaka election commission-ibo election inyakim nung ochi mashi ken o kecha sendaka mali, ta shiogo.

Pai, army-i election ayongzüka agitsü aser temzüng ozüing melenshitsü atema asatepogo, koba nüburtemi agizükra melenshitsü, ta ashi

Suu Kyi Hombarnü linük yimtiba Naypyidaw nung okadak nokdaksü. Tang tashi nungbo la video link ajanga dang shilem agia arudar aser la okatsür dena ajuruteptsü memelai lir.

Junta-i ashiba agi, security dak sendakba nung okatsür den la majurutepdaksü arudar.

## Balochistan nung Islamist political party lenir 3 pokset



**Islamabad, Monupii/May 22 (Agencies):** Hokolbarnü Balochistan kübok Chaman yimti nung bomb pokdaksüba lendong nungi asür tenet rongnung Jamiat Ulema-i-Islam (Nazaryati) lenir asem densema liasü.

Local police ketdangsür Ahmad Mohiuddin-i, bomb ya rally nung shilem agia aliba tamangba yimsü lenir ka indang gari matsingda motorcycle ka nung inoka toktsür liasü, ta ashiba Geo News sangdong ka ajanga metetdaksü.

Dawn sangdong ka ajanga, JUI-N naib emir Maulana Abdul Qadir Luni, shiba dak rangloker bomb pokdatsü, pa kanga mejungi yirur lir.

Ketdangsürtemi ashiba agi, bomb ya Boghara Chowk nung JUI-N-i ayongzüka rally ka tembangba sülen pokdatsü, ta ashi. Iba rally ya Gaza nung Palestine nungertem Israel-i amakba anema ayongzüka agi.

Parnoki ashiba agi, mejangjaba nisungtemi rally agiba tesem anasa motorbike ka nung bomb inoka toktsü, aser

Maulana Luni aser pa pusemerem iba tesem toktsür aoba mapang pokdaksü.

"Bomb ya Maulana Luni dak rangloker pokdaksüba ama reprangteter, kechiyong pa rally agiba tesem toktsüli remote control ka agi motorcycle nung inoka aliba bomb pokdaksü," ta police ketdangsür tejen kati asi.

Pakistan Foreign Minister, Shah Mahmood Qureshi-i, Israel aser Hamas telungpur na tsüingda ceasefire benokba pelashishia agizükba sülen ghonda ishika lir iba lendong atalok. Pakistan-i Palestine ken o ya yimjung nung bentetdaksüner, ta paisa ashi.

Telok ana raratepba sülen tanur 66 densema Palestine nung 243 asü aser Israel nungera tanur ana densema nisung 12 asü, ta Al Jazeera sangdong ka ajanga metetdaksü.

April ita 22 nüa Balochintan yimitba Quetta nung hotel ka kima gari anendena ayudak bomb ka pokdaksüba sülen nisung asem asü aser nisung 13 yirua liasü.



Arishi küm 7 tain Arina Klochkov (tachichi) aser la adianu Zoya nati tena ki semdangba noksa nung angur. Petah Tikva nung parnok aliba ki ya taoba hopta Gaza Strip nungi khaloktsüba rocket agi raksaja liasü.

## BTS indang ken 'Butter' ajanga otsü tasen yangluogo



**New Delhi, Monupii/May 22, 2021 (Agencies):** K-Pop super band BTS-i ken angatsü sapurtem maneni atsüa aruba den külemi chart balala nung temaba jenjang ajangzükteta arudar.

Tawa, BTS puri "Butter" ta nüngja agütsüba ken tasen ka sayaogo aser iba ken ajanga record yangludat. Iba ken ajanga ghonda ka nung terepranger million 110 dak tema atsüa aruogo, koba par teloki taoba mapang sayaba english ken Dynamite indang record ajatetogo.

Hokolbarnü, BTS-i Butter ken sayaa liasü aser YouTube nung iba ken upload ser minute 13 nung million 10 view tashi atu, koba record tasen asütsü.

Iba ken sayar mezüng ghonda

pungo nung, YouTube nung iba track view' 47,034,131 dak tema aküm aser likes' million 4.8 liasü.

Iba band Indang music video tasen ajanga ayatrem (EST) premiere mapang view' million 3.89 tashi atsüa aru.

"Dynamite" sülen BTS puri english ojang temeja amshia atenba ken rongnung "Butter" ya tanabuba alitsü, koba ajanga tangartem tali dang atsüa arur, ta forbes.com sangdong ajanga metetdaksü.

"Butter" ken ya dance pop track ka lir, kong band-i tasa balala amshia iba ken yangluogo. Iba ken choreography ya tsüngsangba yimya balala meyoktepa lir.

Seoul nung global press conference agiba mapang, RM-

ashiba agi, "2021 atema 'Butter' ken ya tsüklawa mongpu atema tetemjen track ka asütsü ama onoki imlar. Ajasünung, onok wadang ajungkettsütsüba maparen aser onok inyakyim tsütsü meranga inyaksü asoshi onoki tajungtiba achayangtsü.

May 23, 2021 nü Billboard Music Awards sentong nung BTS teloki "Butter" ken atentsü terenemba lir.

Aruya aliba Billboard Music Awards 2021 sentong nung par telok telemsa pezü - Top Duo/ Group, Top Song Sales Artist, Top Social Artist aser Top Selling Song nung nomination ngua lir. Ano külen, May 28, 2021 nü Good Morning America indang Summer Concert Series nung parnoki shilem agitsü.

## India nung 'Black Fungus' sülen 'White Fungus' putetdar

**New Delhi, Monupii/May 22, 2021 (Agencies):** Linük tesem balala nung tanabuba (second wave) Covid-19 wara anema raraba mapang ka nung, Patna, Bihar densema India kübok state kar nung nisung aika dak Black Fungus' mesüra 'mucomycortisis' ta ajaba tashidak putetdar.

Covid-19 den Black Fungus' tashidak agi nüburtem aoksatepa aliba tensa ka nung, Bresthibarnü, Patna nung nisung pezü dak 'White Fungus' mesüra 'Aspergillu Flavus' tashidak putetba osang angazükba sülen, health takotet temi ashiba agi, iba fungal infection ya Black Fungus dang kanga agi tamajungba/tesashiba asütsü.

Tang, Bihar yimtiba Patna nung ano nisung ka dak White Fungus puteteta parnok pungo kümogo. Parnok rongnung Patna nungi Doctor ka dena lir ta osang ajanga angazüker. Iba tashidak - 'White Fungus' ya Black Fungus' danga tesashiba lir ta asadanteter.

Senior consultant & head respiratory medicine/pulmonology, Paras Hospital, Dr. Arunesh Kumar-i ashiba agi, immune system tashimait alirtem dak mesüra tzü temenen amshiba ajanga iba tashidak adoktsü akok.

"White Fungus' tashidak alir patient tem Covid-19 ama pa/la dak iba wara temaitsü agi shirangba sayutsü, saka Covid-19 negative putettsü. CT-Scan mesüra X-ray ajanga ang White Fungus tashidak aliba tendangtetsü akok," ta Dr. Kumar-i ashi.

Madhya Pradesh kübok

Jabalpur nunga arishi küm 55 tain tebur ka, shiba COVID-19 nungi taneptsü angu, pa daka white fungus mesüra Aspergillu Flavus tashidak putet. State nung iba tashidak tasen puteter rongnung pa mezüng alitsü, ta Honibarnü health ketdangsür kati ashi.

Tesüiba anogo ka tejekdang, Uttar Pradesh kübok Mau district nungi arishi küm 70 tain tebur ka dak White Fungus tashidak aliba puteta liasü.

Health takotet temi ashiba agi, White Fungus infection' ya Black Fungus dang nungi kanga agi tesashiba lir, kechiyong iba tashidak yagi tepokpok nung kongshiba den külemi temzüng, teküp, tepok, tezüngjang, tekolok aser tebang densema temang shilem balala nung kongshir.

Doctor temi ashiba agi, white fungus yagi tepokpok nung kongshir aser Covid-19 tashidak menaba ama iba fungal infection' agi kongshir alirtem HRCT (High-Resolution Computed Tomography) agiba mapang parnok dak iba tashidak aliba puteter.

Kasa mapang, Mucormycosis, koba dang 'black fungus' mesüra 'zygomycosis' ajar, iba tashidak ya mucormycetes' ta nüngja agütsüba mold telok ka ajanga adokdaksür.

Item 'fungi ya asen meküta aliba ali (soil) aser shizüka aoba (organic matter) talisa tu (leaf), compost piles mesüra süng tashi nung alir, ta Center for Disease Control and Prevention sangdong ajanga metetdaksü.

Health takotet temi ashiba agi, Mucormycosis tashidak ya anepalu mesüi toktsüra iba ya kanga dang lendong asütsü akok.

Iba tashidak temaitsü temji - tekolak anguba, tejak nung ayang ashi, teni atangba, tenük agi junga maguba mesüra tenük ashiba, tejak aser tenük awakba, teni telung nung tanak ka adokba, aketdang/saktsüdang azü adokba aser tekolok inyakyim melenshia akümba alitsü.

Microbiology indang Head of Department, Dr SN Singh-i ashiba agi, tang fungal tashidak tasen (White Fungus) puteta aliba ya Covid-19 agi shirangertem, shirnok oxygen teyari agia anepaludar parnok dak iba tashidak menatsü lendongbang nung lir aser iba tashidak yagi temang nung teküp (skin) raksatsür.

Black Fungus ama White Fungus ya immune system tashimait alirtem atema kanga dang lendong. Diabetes patient aser mapang talangka nungi steroid agirtem White Fungus tashidak menatsü lendongbang nung lir, ta Dr Singh-isa ashi.

White Fungus ya menua putetra, iba tashidak yagi nisung baji südaksütsü akok, ta Singh-i tekümdangtsü agütsü.

Covid-19 agi shirangertem aser Covid-19 nungi taneptsü ngur alirtem dang white fungus memenatsüsa kümdanga alitsü aser züba zülema malitsü asoshi, Dr. Singh-i mepishio.

Mucormycosis tashidak anepalutsü atema anti-fungal intravenous injection agitsüla aser iba mozü dose ka jenjang sen 3,500 alitsü. Iba tashidak atema 'anti-fungal intravenous injection' kisüng ya dang lir aser hopta 8 atema anogoshia iba mozü agitsüla, ta health takotet temi metetdaksü.



**OFFICE OF THE  
MOLUNGYIMSEN SENSO MUNGDANG**  
*Telongjem Nung Terenlok*  
P.O - Tuli, Mokochung : Nagaland - 798618

### ONOKI MAMADOKTETER

Molungyimsen Senso Mungdang (MSM)  
Sanen Luden nung züngsem tajung asür  
WB. SHILUKABA IMSONG, 12th May 2021 nü  
anojungi akümüli toktsür aoba atema kanga  
sasar aser nemjema bilemer.

2018 küm nungi Sanen Luden züngsem  
ka ama inyaka arudang, pai tebilemtsü aika  
bentettsüogo aser mapa ajak nung takok ngua  
yaritepa aruogo. Talisa, pa talidak Dimapur  
yimti nung yimer sendakba loktitem nung pai  
shilem tajung agia aruogo aser Dimapur  
Molungyimsen Kaketshir Telongjem (DMKT)  
senyur teinyakdak nung pa arishi tembangogo.

Pai inyaka yutsüba mapa tajungtem onoki teti bilemtettsü aser  
Tsüngremi pa tanüla teti anisüngzük ngudakjangma ta sarasademtsür.  
Maneni, MSM-i asüri toktsür aoba kibong den mangyim tejashi  
lemsateper.

*Senso ajak tenüng nung,*

Sd/- **N Joseph Lemtur**  
Tir, MSM

Sd/- **L Rongsenmeren Sanglir**  
Tongti Zülur, MSM

## MULUNGNEN O



**Aso:**  
12/10/1969

**Asü:**  
16/05/2021

Meimlaba mapang ka nung onoki teti meima aliba asür  
**Wt. Moasangla (Longsa)** mapang tatsü ka shiranger la alima  
nungi piladang kinungertem shisabulu aser mangyim jashi nung  
alidang Kija, Kibong, Arogo, Yimden aser Lokti shirnokisa  
sarasadem, nübo, shisatsü aser rongsen agi nungita yaritepogo  
nenok ajak dang kanga pelaba lemsateper, asen teyanglur  
Tsüngremi nenok mapa tajung meyiba moatsütsü onok sarasadem.  
~ *Temiem kinungpu, jala aser kinungertem.*

## Mouni Roy-i Iskcon Foundation nung tenla agütsü

**New Delhi, Monupii/May 22, 2021 (Agencies):** India

nung COVID-19 wara anema raraba mapatong pusema, tongtibang nisung aikati iba wara dak sendakba nung tekümdangtsü osang sangoktsütsü asoshi mera tajung agidar. Linük tesem balala nung vaccination drive sentong tem takok ngua agiyongjia, nubur aika dak iba tashidak maneni putetdar.

India nung tanabuba Covid-19 wara adoker külen nungi, iba tashidak agi shirangertem anepalutsü asoshi mozüki nung yipden, oxygen cylinders, mozü aser injection peria maliba ajanga timtem jenti ajurudar. Iba ama tensa ka nung, tongtibang (celebrity) nübu aikati pei akokba yari lenmang balala ajanga nübur nem teyari agütsüdar.

Tawa, actress Mouni Roy-i Instagram sabang ajanga, Mayapur, koba Iskcon Foundation indang tekolak lir, iba indang jembiogo. West Bengal kübok Mayapur jila nung medical facility peria maliba ajanga nübur timtemba indang lai lemsatepa liasü.

Covid-19 agi shirangertem



**Mouni Roy (File photo)**

tajungba anepalutsü atema, Iskcon Foundation-i Mayapur nung medical facility ka yangludat aser actress Mouni-i iba foundation nung tenla agütsüogo.

Video ka ajanga, lai iba Foundation atema tangatetba tajung nung tenla agütsütsü asoshi nüburtem ayongzük.

Covid-19 agi shirangertem anepalutsü atema yipden, oxygen cylinder, doctor, ambulance, chiyongtsü aser tanga medical osettsüsettem nüngdaker, ta lai ashi.

Tawa, Mouni-isa Give India Foundation nung tenla agütsüogo. Acting tsütsü, lai Ayan Mukerji indang 'Brahmastra' nung Alia Bhatt, Ranbir Kapoor aser Amitabh Bachchan nung den külemi shilem agiba angütsü.

# August 21 nü Pacquiao-i Spence Jr. den tsüngteptsü



Manny Pacquiao & Errol Spence Jr.

**Monupii/May 22, 2021 (Agencies):** Philippines nunger nüngtugu boxer Manny Pacquiao-i August 21, 2021 nü Errol Spence Jr. den tsüngteptsü terenemba lir, ta Hokolbarnü social media sabang ajanga boxer anapronglai taruba 'fight' dak sendakba nung osang sangoktsü.

Iba bout ya Fox pay per view nung reprangtetsü. The Athletic sangdong ajanga angazükba agi, Pacquiao-i website dang iba fight ya Raiders' home, Allegiant Stadium (70,000-seat capacity) nung asayatsü ta shia lir, saka MGM Grand nungang boxer ana tsüngda tsüngteptsü imlar.

Arishi küm 31 tain Spence, shiba WBC aser IBF welterweight world champion

lir, pai 27-0 den 21 knockout ngua lir.

Ano külen, Pacquiao (62-7-2, 39 KOs)-i division 8 nung title ngua lir.

"Asayar tajung (Spence) den tokteptsü ni jangrar," ta interview agiba mapang arishi küm 42 tain Pacquiao-i The Athletic dang ashi.

"Alima nung welterweight jenjang nung tsüngteper rongnung Spence ya tajungtiba ama ajaki züngshir aser Pacquiao-ia mapang shia tetokteper balala den tasüita tsüngtepa aruogo," ta Manny Pacquiao indang Promotions president Sean Gibbons-i ESPN dang ashi.

"YouTuber mesüra social media nungi nübu mashi mashi den Floyd Mayweather-i

tsüngtepa ama pai (Manny) suwar/tamachi yimya mesayatsü aser boxer ka ama iba tenüng amer pai maneni tim asaya yimya nung shilem aginür. Pai teti dang boxer tajung den tsüngtepa aruogo aser tang Tangbo pai iba yimya memelenshi asaya aotsü," ta Sean-i shisem.

Mayweather-i June 06, 2021 nü YouTuber Logan Paul den exhibition bout ka nung tsüngteptsü tenangzüktep agia lir.

2015 küm Mayweather aser Pacquiao na tsüngtepego, kong Mayweather-i takok angu.

Pacquiao-i toktsür aliba WBA super welterweight title belt akoktsü atema 2019 küm July ita pai Keith Thurman tsükdaktsü.

# Abu Dhabi nung PSL asayatsü: PCB

**New Delhi, Monupii/May 22, 2021 (Agencies):** Taoba mapang tom nungi thitemer aliba PSL-6, June 5, 2021 nungi asaya tenzüktüsü asoshi Pakistan Cricket Board (PCB)-i asalentong yangludat aser iba asayamung atema training agi metenzükdang asayar ajak anogo 10 quarantine asütsü.

Karachi Kings indang kibur, Salman Iqbal-i ashiba agi, asayartem, ketdangsürtem aser broadcasting crew züngsemtem anogo 10 tashi quarantine asütsü atema PCB aser UAE tekolokpur tsüngda inyakyim aser temzüng tem züngzüktepego.

"Anogo 10 quarantine mapang, anogoshia parnok ajak Covid-19 test agitsü," ta Iqbal-i ashi.

PCB otongdar sangdong ka ajanga angazükba agi, Pakistan nungi aser bendanglen nungi shilem agitsüpur asayartem May 25, 2021 nü Abu Dhabi-i

aotsü sentong renemdar. Ajasünungang, quarantine' nung amungtsü asoshi mapang peria angutsü aser iba sülen June 5, 2021 nü asaya tenzüktetsü.

Abu Dhabi-i maodang, Pakistan aser bendanger asayartem den ketdangsür ajak Pakistan nung anogo asem tashi quarantine asütsü.

Abu Dhabi nung COVID-19 bio-bubble achaayangtsü atema Board-isa taa agitsü international company - Restrata pur teyari meshiogo, kong hotel balala asem nung team trok lemsar anendaktsütsü.

Abu Dhabi nung PSL 6 indang tanüngba match 20 asayatsü atema PCB-i UAE nung tekolokpurtem dang temelaba meshiogo.

Covid-19 tensa mejungi küma aoba ajanga Pakistan nungi UAE-i aruba tayimtsü (flight) ajanga anentsür aliba dak sendakba nung UAE Sorkar

nungi temelaba angutsü asoshi PCB pur osang tejangja ka menguteti arur anogo ishika sülen, Abu Dhabi nung iba asayamung ayongzüktsü asoshi temelaba osang jangjatsür alitsü.

Iba asayamung dak sendakba nung temelaba agitsü asoshi, taoba hopta PCB indang telok ka Abu Dhabi-i oa sensaksemogo.

PSL 6 nung shilem agir asayartem aser ketdangsür tsüngda Covid-19 tashidak putetba ajanga, match 14 dang asayar sülen March 04, 2021 nü Karachi nung iba asayamung thitemja liasü.

Pakistan nung Covid-19 tensa mitba/asadangba telok - National Command & Operations Authority ajanga Karachi nung iba asayamung ayongzüktsü asoshi metetdaksüba sülen, Board-i PSL 6 indang tanüngba asaya ajak UAE nung ayongzüktsü lemtet.

# British athlete aser staff tem vaccine agitsü: BOA

**London, Monupii/May 22, 2021 (Agencies):** Aruya aliba Olympic atema Tokyo-i maodang, iba Games aser Paralympic Games nung shilem agitsüpur - Team Great Britain athlete aser staff tem COVID-19 vaccine agitsü, ta British Olympic Association (BOA) sangdong ka ajanga metetdaksü.

BOA-i ashiba agi, International Olympic Committee (IOC) aser

Pfizer tsüngda züngzüktepeba mapatong ajanga iba mozü agitsütsü, koba tang Britain nung nüburtem agüja aliba vaccine inyakyim nung iba maparen yagi tenokdangba madokdaksütsü.

"Tokyo 2020 Olympic aser Paralympic Games metenzükdang, Team GB aser Paralympics GB athlete aser support staff ajak vaccine agitsü atema UK Sorkar ajanga osang

jangjatsüogo," ta BOA otongdar kati ashi.

Hokolbarnü, IOC Vice President John Coates-i ashiba agi, July 23 nungi August 8, 2021 tashi ayonga asayatsü aliba Games metenzükdang Olympic Village nung alir shilem 80% dak tema vaccine agitsütsü. Paralympic Games ya August 24 nungi September 5, 2021 tashi asayatsü.

# India nung athlete 148 tashi vaccine agiogo: IOA

**New Delhi, Monupii/May 22, 2021 (Agencies):** Aruya aliba Tokyo Games atema saisapong balala nung temsüa akümer asayartem densema saisapong wadang ajunga nung athlete 148 tashi COVID-19 vaccine mezüng dose agiadokogo, ta Indian Olympic Association (IOA) sangdong ka ajanga metetdaksü.

Vaccine agidoker alir athlete 148 rongnung athlete 17 tashi dose anaprongla (mezüng aser tanabuba) agiogo aser tanüngba athlete 131 tashi mezüng dose agia lir, ta IOA president Narinder Batra-i ashi.

Parnok 148 rongnung, Tokyo Olympics, koba July 23 nungi tenzüktüsü sentong lir, iba asayamung nung shilem agitsüpur athlete tem dena lir.

Item athlete dak alia, Tokyo Paralympic nung shilem agitsüpur athlete 13 tashi mezüng Covid-19 vaccine agiogo; kasa mapang athlete ana tashi Covid-19 dose anaprongla agiadokogo. Tokyo Paralympics ya August 24, 2021 nü nungi tenzüktüsü.

May 20, 2021 tashi mezüng Covid-19 dose agir rongnung athlete aser para-athlete densema parnok 163 alitsü.

Tokyo-i aotsüpur India

athlete aser ketdangsür tem May 20, 2021 tashi vaccine agiba indang osang agitsüba mapang, Batra-i ashiba agi, ketdangsür 87 tashi dose ka agüja lir aser parnok 23 tashi COVID-19 vaccine dose ajunga agiadokogo.

Tokyo Olympics atema India nunger athlete 90 dak tema temsüa kümogo. Iba asayamung taoba küm asayatsü renem, saka Covid-19 wara süshia maoba ajanga iba Games küm ka tashi atsülangtsüsa aküm.

Olympic nung shilem agitsüpur India nunger shooter, shirnok Croatia nung training tagidak lir, parnok iba tesem nungi indang indanga Tokyo-i aotsü ama asadangteter asünung, shooter tem iba linük nung vaccine agitsü, ta NRAI-i ashi.

Training atema Croatia-i maodang, shooter kar India nung mezüng Covid-19 vaccine agiadokogo aser vaccine agiadoker alirtem iba linük nung tanabuba dose agitsü.

Ano külen, tang Italy nung training tagidak Fencer, Bhavani Devi-a training agiba tesem nung mezüng dose agiogo. Kasa mapang, weightlifter Mirabai Chanu-a United States nung iba mozü agitsü imlar.

# Canada swimming team-i pre-Olympic training camp athir



Canada swimming team

**Tokyo, Monupii/May 22, 2021 (Agencies):** Coronavirus wara süshia maoba dak sendakba nung tebilemetsü adokba ajanga 'Tokyo 2020 Olympic Summer Games' tenzüktüsü lia, Canada swimming team-i Japan nung 'pre-Olympic training' sentong thitemtsüogo, ta Kyodo sangdong ajanga metetdaksü.

Pre-Olympic training camp nungi tukadoker telok (linük balala tenüng nungi shilem agitsüpur) 50 rongnung Canada team tesüsa tukur alitsü. Japan kübok Tokyo aser tongtibang yimti tem nung pezübuba Covid-19 wara nokdangtsü asoshi 'state of emergency' aliba ajanga iba training camp nung shilem agitsü team timba kati meyipadok.

Canada team nung swimming athlete aser coach 60 tashi anüolen Tokyo nungi kilometer 250 (mile 155) shi pilar Toyota city nung July 9 nungi July 30, 2021 tashi amungtsü renemer liasü, ta Kyodo sangdong nung shia lir.

Anogo atsülangtsür aliba Games, July 23, 2021 tenzüktüsü lhopta tuku dang anünga lia, iba Games ayonga asayaba ajanga tang ama Covid-19 tensa tamajungdang medical system nung ano khuret talila bendenloktüsü ama nüburtemi tsübua bilemba nung International Olympic Committee asadangdar.

Olympic atema sentong tem renemshiba aser coronavirus dak sendakba nung tekümdangtsü meratem agitsü mechi asadangshia jembitsü nükjidong nung IOC aser tanga tentetem anogo asem tashi senden amenba Hokolbarnü tembangogo.

Reuters company kati asadangshiba densema nüburtemi pei tebilemba lemsateteba Hokolbarnü sangdongogo. Iba survey aser poll nung nübur aikati taküm tsüklawa mongpu mapang iba Games masayatsü aser iba asayamung athitsü mesüra anogo atsülangtsü asoshi tebilemba lemsatetepogo.

## BILEMDANGANG

"Mapang tajung ajakji pei meyong dangbo masü."